

IN DÌ D'OGGHJI

Conti di Saldigna



LA DÌ 16 MALZU DI LU 1626



LU VICERÉ SPAGNOLU DON GHJIRÓNIMU PIMENTEL PRIPPÀRA LI MILÌZI SALDI CONTRA UN PUSSIBILI ATTACCU INGLESU.



Lu **Re spagnolu Filippu IV, dittu "Lu Mannu"**, (1621-1665) impunìsi a lu **nóu viceré di Saldigna Don Ghjirónimu Pimentel**, malchesu di Baiona (malchesatu a tramuntana di lu Poltugallu), di tiné pronti le milizi saldi tantu illa custéra chi illi cità, sèndi chi l'almata inglésa, filmata da Cadice illu mési di Santigàini di lu 1625, podarà tintà di 'incì próppiu in Saldigna. Ma chistu pa' fultuna nostra no cumbinési. La **spidizioni di Cadice di lu 1625** stési próppiu una spidizioni navali siguta da una aunita di inglesi e olandesi contra la Spagna, nata pa' sanà una scéra di disputti economici tra li potenzi europei.

Carlu I di Inghilterra, fattu re da poc'óra, pidhési la dizzisiòni di dichjarà gherra a la Spagna e lu duca di Buckingham cumincési a pripparà la campagna.

La spidizioni aia diffarènti scòppi, com'e pidhà pussèssu di lu suiddhàtu traspultatu da li nai spagnóli chi viniani da l'Americhi e dunca attaccà li cità e li tanti regni spagnóli pa' arricà stròbbu a l'economia e indibbuli li pruisti da la Spagna vel di lu Palatinatu. Ma chista spidizioni è ambaràta mintuàta cun tristùra pa' li inglesi palchì dapói di abbèddhu stròbbi in mari, candu arriési l'óra di lu sbalcu, li truppi



inglesi s'agattésini chena alimèntu e chen'éa; lu cumandanti inglese Cecil pidhési pal chissu la dizzisiòni di cunzidì a l'òmini di bi sèndi in silvizziu di lu 'inu présu da li casi di lu lócu.

Innantu a li truppi inglesi falési un'imbriachéra manna, lassèndi sani sólu pochi passòni. Candu s'avvidìsi di lu dannu fattu, Cecil impunìsi a l'òmini di turrà a alzà innantu a li nai e arrindissi. Candu arriési l'almata spagnóla, agattési più di 1.000 suldati inglesi imbriàchi e passési tutti a ispada chena chi nisciun colpu di fusilì o pistola venisi tiràtu.



Attarràtu e in tristùra, lu cumandanti inglésu Cecil dizzidìsi di turrà in patria cu' li pochi nai chi l'éranì ambaràti (posti puru mali), pidhèndi da chì lu tantu di acchittu bastanti pa' turrà in Inghilterra. Ma dapói di tanti mesi li spagnóli timàni un altu attaccu inglese proppiu illi só' regni di lu Mediterraneu e, pa' chistu muttù, **avvisésini lu viceré di Saldigna.**